



Stads al di da partida èn er cusseglier nazional Jean-François Rime (san.) e Renatus Catt, il candidat sursilvan da la PPS per il cussegl nazional.



Da l'Engiadina bassa èn vegnids al di da partida, (da san.) Not e Barblina Michel e Reto Rauch.



Andrea Davaz (san.), il vicepresidente da la PPS grischuna cun Nicola Stocker, in dals candidats per il cussegl nazional da la PPS giuvna.



Sin la glista internaziunala per il cussegl nazional da la PPS figurescha er Gabriella Binkert Becchetti da la Val Müstair.



Mario Salis, il deputà da San Murezzan, cun sia dunna Erna Salis.



Il cusseglier nazional Heinz Brand (san.) cun Adrian Amstutz, il schef da fracziun da la pps.

FOTOS G.N. STGIER

«Nossas tematicas occupan la populaziun»

St. Luzisteig: Di da partida da la partida populara svizra pps

DA GION NUTEGN STGIER/ANR

■ **Cun ina gronda festa ha la partida populara svizra pps lantschà il cumbat electoral per las elecziuns naziunales che han lieu en duas mais. L'indipendenza, la neutralità, la democrazia directa, l'UE e l'immigraziun, quai èn anc adina ils temas da la pps per far vusch ed avai success.** Gist en massa èn las delegadas ed ils delegads vegnids sin il St. Luzisteig, il lieu en la vischinanza da Maiavilla. En la tenda da festa a l'ur dal gaud era strusch be in plaz liber cun esser preschentas passa 900 persunas. Beneventadas èn quellas vegnidas da Heinz Brand, il cusseglier nazional e president da la pps grischuna. En ses pled da bainvegni ha el ditg ch'èn il Grischun saja anc pussaivel da far ina occurrenza da partida senza preschientscha da la polizia sco per exempel a Turitg. El saja satisfatg dal grond interess per quel di da partida e ventiraivel che tants hajan chattà la via en il Grischun. Albert Rösti, il cusseglier nazional dal chantun Berna e manader dal cumbat electoral ha ditg che a la pps gartegia adina d'emplenir ina gronda tenda, saja quai a Geneva,

ubain da l'autra vart da la Svizra en il Grischun. Quai saja la marca da la pps, ha accentuà Albert Rösti.

Quatter empermischuns

Cumenzà ha il di da partida cun chantar l'imni nazional, nua che la blera prominenzia politica da la pps e delegadas e delegads èn s'auzads. En ses pled ha Toni Brunner, il president da la pps, ditg che en nagin cas duai la Svizra sa colliar cun l'Uniu europeica. Las otras partidas hajan già capitulà da cumbatter cunter il sa vischinar a l'UE. Ultra da quai saja la Svizra en prievev pervia da l'immigraziun senza mesira e la criminalità e violenza entras ils asilants. Toni Brunner vul en tuttas modas e manieras limitar l'immigraziun, ina mesira fitg urgenta. En in-tgins onns haja la Svizra diesch milliuns abitants pervia da l'immigraziun e quai saja inacceptabel. In asilant custa a la Svizra dapli che la summa da renta dad ina persuna pensiunada e quai saja bain sgarschavel. Per segirar plaz da lavur saja urgent er da sbassar las taglias e da reducir las regulaziuns federalas, ha ditg Toni Brunner. «Noss temas occupan la populaziun», ha menziunà il pre-

sident da la pps. Grazia a quels duai la partida avair success tar las elecziuns naziunales dals 18 d'october, conferma Toni Brunner. El è er da buna speranza che suentar las elecziuns naziunales da quest atun, saja la pps grischuna represchenta da a Berna cun duas mandats entras Heinz Brand e Magdalena Martullo-Blocher.

«Nus avain ina regenza sanestra»

Retschet bunamain sco in «messias» è vegnì Christoph Blocher, l'anteriu cusseglier federal e surbab da la pps. En ses pled ha el undrà las valurs svizas, l'indipendenza, la neutralità, la libertad e la democrazia directa. «Quellas valurs avain nus da defender», ha ditg Christoph Blocher. Il 2015 saja in on decisiv per la Svizra ed i gjaja er per chausas fundamentalas. Dapi il 1848, l'on fundaziun dal stadi svizzer, haja la Svizra per l'emprima giada ina regenza sanestra. Senza la politica da la pps vegnia ad ir mender cun noss pajais, cun sa vischinar quella adina pli fitg a l'UE. «Quai avain nus da la pps d'evitar urgentamain», ha ditg Christoph Blocher. Ed era per quels plects ha el retschet in applaus frenetic.



Mamma e figlia. (da san.) Silvia Blocher e Magdalena Martullo-Blocher.